

Sunday, February 15, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT
REGIONAL NEWS BULLETIN
(MIDDAY)



ONCOLOGISTS

Ni 3-awh Aijal Club-a hmarchhak Cancer doctor inzawmkhawm pawl inkhawmpui chu vawiin chawhma khan a tiak ta.

Mizoram State Cancer Institute-in a thlen, India hmarchhaka Cancer Doctor rual inzawmkhawm pawl, Association of Oncologists of Northeast India (AONEI) inkhawmpui vawi 21-na hi Zirtawpni zan khan Aijal Club-ah Health & Family Welfare Minister Pi Lalrinpuii'n a hawng a. Ramchhung hmun hrang hrang atangin Cancer lama mi thiam rualte an kalkhawm a ni.

Health Minister chuan, Mizoram chu India rama cancer vei tamna hmun a nih thu leh National Cancer Registry Programme hnuaiia report hrang hrangah tarlan a nih danin Mizoram leh hmarchhak state-te chu chawkawng chuap, hnute leh chhul hmawr cancer hluarna hmun a nih thu a sawi a. India rama cancer doctor rualte intawhkhawmna hun Mizoramin a thleng chu cancer dona kawngah thil lawmawm tak a nih thu a sawi a. Mizorama damlo a bikin cancer natna veite tan rah duhawm tak chhuah ngei se a duh thu leh Mizorama cancer hluar lutuk tih ziaawmna turin theihtawpa hma lak a nih thu sawiin, Mizoram sawrkar leh JICA tangdunin cheng vaibelchhe 700 senga Mizoram State Super-Specialty Cancer & Research Centre, Zemabawka an din tur pawh, hna thawh tan a ni tawh ati a, thling thlak (bone marrow transplant) theihna tur te, nuclear hmanga enkawlna chi hrang hrang, PET Scan leh cancer endikna chi hrang hrang tih theihna turte pawh dah a nih tur thu a sawi bawk.

AONEI inkhawmpui hi kum tinin hmarchhak state hrang hrangin an inthlen chhawk thin a. He conference chhim tur hian ramchhung hmun hrang hrang atangin member za chuang an kal khawm a, India ram hmunpui zawka cancer chungchanga thiamna ril tak tak nei - Dr Pankaj Chaturvedi, Director, Advanced Centre for Treatment, Research and Education in Cancer (ACTREC), Mumbai te, Dr. Dodul Mondal, Radiation Oncologist, Max Hospital, Delhi te, Dr Mohammed Imaduddin, Surgical Oncologist, Cion Cancer Clinics, Hyderabad te leh Dr Harikrishna Kovilapu, Medical Oncologist, CMC, Vellore-te pawhin thu an sawi a ni.

AONEI hi kum 2004 khan Dr C. Bhuyan (Medical Oncologist) leh Dr Judita Syiemlieh (Radiation Oncologist) ten, cancer doctor dang 20 velte nen tang ho a an

din a ni a. India hmarchhaka cancer doctor-te bakah, doctor thiamna chi hrang hrang neite nen inthlunzawmin an thawkho bawka ni.



LESDE FEST

Labour Employment Skill Development & Entrepreneurship (LESDE) Minister Pu Lalngchinglova Hmar chuan LESDE Kut chu kuthnathawkte, thiamthil neite leh hna zawng mekte puala buatsaih a nih thu a sawi.

Nimin khan Aizawl Lammualah LESDE Kut 2026 hi khar a ni a, he hunah hian Minister chuan LESDE Department inhmelhriattirna leh sawrkar hnuaiia hamthatna hrang hrang an dawn theihthe pholanna hun a nih thu a sawi a. LESDE Department chu department lian ni lo mah se Central Ministry 5 – Labour Ministry, Skill Development & Entrepreneurship Ministry, Ministry of External Affairs leh Ministry of Corporate Affairs nen indawrin an thawhho thu a tarlang a. Mizoram pawh entrepreneurship leh thiamthil zir kawngah hma a sawn viau rualin, thil tha zawk leh danglam zawk ngaihtuah chhuaka siam chhuah tum zel turin kalkhawmte a fuih a ni.

LESDE Kut-ah hian dawr 162 hawn niin, heng zingah hian Mizoram pawn atangin dawr 11a tel a, February ni 13 thlenga chhinchhiah danin Kutah hian kuthnathawkte leh hna zawng mek mi 234 sawrkar ruahmanna hrang hrang hnuaiiah an inziaklut a, mi 28-in hna an hmu a, mi 1,000 chuang a thlawnin an inentir a. Dawr hrang hrang inhralh zat belhkhawm chu cheng nuai 35 vel bawr a tling a ni.



V-DAY BLOOD DONATION

Nimina inhmangaihte ni, Valentine's Day-ah khan Mizoram hmun hrang hrangah hriat theih chinah mi 614-in a mamawhte tan a thlawnin thisen an pe.

Association for Voluntary Blood Donation (AVBD) Vice President Pu K. Zothanpara hnen atanga thu dawn danin Aizawl district-ah thisen pe an tam ber a, Civil Hospital-ah mi 277-in thisen an pe a Zoram Medical College & Hospital-ah mi 71 in an pe bawka . Lunglei district-in dawtin mi 86-in thisen an pe a, Champhai district-ah mi 80 in thisen an pe bawka. Serchhip district-ah mi 34 in thisen an pe a, Siaha leh Lawngtlai district-ah mi 33 ve ve-in an pe bawka a ni. Pu K. Zothanpara'n a sawi danin Valentine's Day puala thisen pek hi kum 2010 khan Mizoramah tan a ni a, bul tantu chu TV anchor thin Zikpuii Pachuau niin, a thupui-ah "Blood for your Valentine" tih hman a ni. Kum 2010 atangin kumtin buatsaih a ni ta a, a hnuah AVBD-in a kutken chho zui a, Mizoram State AIDS Control Society (MSACS) leh blood bank-te nen thawkhoin buatsaih thin a ni. Kum 2013 atangin district dangah pawh tih tan a ni a, thupui atan "Show Love, Give Blood" tih hman a ni.

Nimina V-Day puala thisen pek pawh hi AVBD, MSACS leh National Health Mission (NHM) tangrualin an huaihawt a ni a. Kum 2010 atanga nimin thleng khan V-Day puala thisen petu hi mi 12,235 an ni a. Kum 2020 khan mi 1,131-in thisen pe in , pek tam ber kum a ni a. Thisen pe an tlem ber kum chu a tan kum, 2010 kha a ni a, mi 146-in thisen an pe a ni.

